



# ceumannan 4

## ceumannan 4

Pàipear-taic

Earrannan Èisteachd *Listening extracts*

## (C4-2-2-1) Ceumannan 4 Modal 2 Aonad 2 Earrannan Èisteachd

### (C4-2-2-2) Earrann 1 (2. Èist Tha mi airson fuireach ann am Peairt)

- (C4-2-2-3) a. Tha mi airson suidhe sìos.
- (C4-2-2-4) b. Tha mi airson bruidhinn ri Pòl.
- (C4-2-2-5) c. Chan eil mi airson falbh dhachaigh.
- (C4-2-2-6) d. Tha mise airson dràibheadh.
- (C4-2-2-7) e. Chan eil mi airson fuireach ann am Peairt.
- (C4-2-2-8) f. Sìne: Iain, a bheil thu airson a dhol dhan amar-snàmh?  
Iain: Tha. Tha mi airson a dhol ann. Tapadh leat.

### (C4-2-2-9) Earrann 2 (3. Èist Tha mise airson obair fhaighinn)

- (C4-2-2-10) a. **Tidsear:** Dè tha sibh airson a dhèanamh nuair a dh'fhàgas sibh an sgoil, a Shiùsaidh?  
**Sùsaidh:** Tha mi airson a dhol dhan oilthigh. Thèid mi a Ghlaschu.
- (C4-2-2-11) b. **Tidsear:** Alasdair?  
**Alasdair:** Tha mise airson obair fhaighinn.
- (C4-2-2-12) c. **Tidsear:** Iain?  
**Iain:** Tha mi airson a dhol dhan cholaiste ann an Inbhir Nis.
- (C4-2-2-13) d. **Cairistiona:** Tha mi fhìn airson a dhol dhan oilthigh. Tha mi ag iarraidh a dhol a Dhùn Èideann.  
**Tidsear:** Glè mhath, a Chairistiona.
- (C4-2-2-14) e. **Tidsear:** A Mhìcheil? Dè nì thu fhèin?  
**Mìcheal:** Tha mise airson obair fhaighinn. Tha mi airson a bhith nam iasgair.  
Tha bàta aig m' athair. 'S e iasgair a th' ann cuideachd.
- (C4-2-2-15) f. **Tidsear:** Agus, a Mhàiri Anna?  
**Màiri Anna:** Chan eil mi a' smaoinichadh gu bheil mi airson a dhol gu colaiste no oilthigh. Tha mi a' smaoinichadh gu bheil mi airson obair fhaighinn.

### (C4-2-2-16) Earrann 3 (10. Èist Am biodh ùidh agad ann an club-dràma?)

- (C4-2-2-17) a. **Mgr C:** Tha mi a' smaoinichadh air club-dràma a ruith an dèidh na sgoile.  
Bhiodh an club ann gach Diciadain aig ceithir uairean. Tha



mi airson faighinn a-mach am biodh ùidh agaibh anns a' chlub seo.

A Dhaibhidh, am biodh ùidh agad ann an club-dràma?

**Dàibhidh:** Bhitheadh.

**Mgr C:** A Chatrìona, am biodh ùidh agad ann?

**Catrìona:** Bhitheadh.

**Mgr C:** A Chalum? Am biodh ùidh agad-sa ann an club-dràma?

**Calum:** Cha bhitheadh.

**Mgr C:** Iain? Am biodh ùidh agad ann an club-dràma?

**Iain:** Bhitheadh. Bhiodh e math.

**Mgr C:** A Mhàiri, am biodh ùidh agad ann?

**Màiri:** Hmm... cha bhitheadh Tha mi duilich.

**Mgr C:** Tha sin ceart gu leòr, a Mhàiri. Am biodh ùidh agad fhèin ann an club-dràma, Angela?

**Angela:** Bhitheadh. Is toigh leam dràma.

---

**(C4-2-2-18) Earrann 4 (11. Èist Cha bhiodh ùidh agam ann an tàileasg)**

(C4-2-2-19) a. **A:** Tha mi a' dèanamh rannsachadh mu chlubaidhean às dèidh na sgoile. A bheil thu airson bruidhinn rium?

**P:** Tha. Siuthad.

**A:** Am biodh ùidh agad ann an club-snàmh?

**P:** Bhitheadh.

(C4-2-2-20) b. **A:** Am biodh ùidh agad ann an còisir Ghàidhlig?

**P:** Cha bhitheadh. Chan urrainn dhomh seinn!

(C4-2-2-21) c. **A:** De mu dheidhinn dràma? Am biodh ùidh agad ann an club-dràma?

**P:** Cha bhitheadh.

(C4-2-2-22) d. **A:** Am biodh ùidh agad ann an iomain?

**P:** Bhitheadh! Bhiodh sin uabhasach math.

(C4-2-2-23) e. **A:** Am biodh ùidh agad ann an club obair-dachaigh?

**P:** Cha bhitheadh.

(C4-2-2-24) f. **A:** Am biodh ùidh agad ann an club-film?

**P:** Hmmmm. Bhitheadh – 's dòcha.

(C4-2-2-25) g. **A:** Am biodh ùidh agad ann am marcachd?

**P:** Cha bhitheadh! Cha toigh leam eich.

(C4-2-2-26) h. **A:** Agus am biodh ùidh agad ann an club-tàileisg?

**P:** Club-tàileisg? Dè tha sin?



- A:** 'S e club chess a th' ann.
- P:** Ò. Cha bhitheadh. Cha bhiodh ùidh agam ann an tàileasg.
- A:** Tapadh leat.
- P:** 'S e do bheatha.

**(C4-2-2-27) Earrann 5 (Sùil air Ais 1. Èist Tha mi airson a dhol a-mach a-nochd)**

- (C4-2-2-28) a. **Anna:** Is mise Anna agus tha mi air a' cheathramh bliadhna ann an Àrd-sgoil Inbhir Nis. An-ath-bhliadhna, tha mi airson a dhol dhan cholaiste.
- Nì mi cùrsa coimpiutaireachd.
- (C4-2-2-29) b. **Dòmhnall:** Tha mo bhràthair lain airson a bhith na phlumair.
- (C4-2-2-30) c. **Seonag:** Càit an tèid sinn air saor-làithean am-bliadhna, a Sheòrais?
- Seòras:** Hmm... Uibhist?
- Seonag:** Uibhist? Tha mise airson falbh dhan Spàinn. Tha tràighean brèagha ann.
- Seòras:** Tha tràighean brèagha ann an Uibhist cuideachd.
- Chan eil mise airson falbh dhan Spàinn. Bidh e ro theth.
- (C4-2-2-31) d. **Catrìona:** Hai, a Lionsaidh. Ciamar a tha thu?
- Lionsaidh:** Hai, a Chatrìona. Chan eil dona tapadh leat. Dè tha dol?
- Catrìona:** Tha mi a' dol gu club-hocaidh às dèidh na sgoile an-diugh.
- A bheil thu airson cluich?
- Lionsaidh:** Chan eil tapadh leat, a Chatrìona. Bidh mi trang.
- Tha tòrr obair-dachaigh agam.
- (C4-2-2-32) e. **Pòl:** A Shine, a bheil thu airson a dhol dhan taigh-dhealbh a-nochd?
- Tha film math air.
- Sìne:** Tha. Bidh sin math. Cuin a tha e air?
- Pòl:** Tha, aig seachd uairean.
- Sìne:** Glè mhath.
- (C4-2-2-33) f. **Fionnlagh:** Is mise Fionnlagh. Tha mi sia-deug agus tha mi a' fuireach ann am Malaig.
- Cha toigh leam a bhith a' fuireach an seo. Nuair a bhios mi nas sine, tha mi airson fuireach ann am baile mòr mar Ghlaschu.



(C4-2-2-34)

**Earrann 6 (Cultar) Èist Adhaircean Mòra air a' Chrodh a tha fad às le Murchadh MacLeòid**

Bha siud ann uaireigin gàirnealair òg agus dh'fhàs e uabhasach **mì-thoilichte**. Nis, cha robh adhbhar aige a bhith **mì-thoilichte**, 's ann a bha còir aige a bhith làn **riaraichte**. Cha robh flùraichean no luibhean anns an dùthaich a bha cho math ris an fheadhainn aigesan, agus an uair a bheireadh e dhan mhargaidh iad, bhiodh e **daonnan** a' faighinn **deagh phrìs** orra. Cha robh bliadhna nach biodh e a' faighinn deagh dhuaisean air an son. Ach an dèidh sin 's na dhèidh, cha robh e idir **riaraichte** agus cha robh an obair aige idir a' còrdadh ris. "Chan eil mi ach a' tionndadh 's a' ruamhar 's a' cur 's a' tionndadh 's a' ruamhar," thuirt e ris fhèin, "bliadhna an dèidh bliadhna. Chan eil sin gu feum sam bith dhòmhsa. Cha chreid mi nach toir mi mo chasan leam às an seo. Gheibh mi obair eile agus cha bhi mi a leth cho trang 's a tha mi."

Sin dìreach an rud a rinn e. Thug e às an latha sin fhèin agus dh'fhàg e an gàrradh an siud, an gàrradh brèagha far am biodh na h-eòin a' ceilearadh agus far am biodh srann aig na seilleanan. Ghabh e roimhe agus ghabh e roimhe gus mu dheireadh an tàinig e gu àite far an robh seann duine na shuidhe aig doras bothain agus e a' seinn na fìdhle. "Nach math an dòigh a th' agaibh," thuirt e ris a' bhodach, "air **cosnadh** a dhèanamh! Saoil an ionnsaich sibh dhomh fhìn port a thoirt às an fhidhill?"

"Is mise gu dearbh a nì sin," fhreagair am bodach, "ach cuimhnich thusa, a laochain, gum feum thu a bhith ag ionnsachadh fad uairean-a-thìde a h-uile latha air neo **cha tig an latha** a bhios tu math air an fhidhill."

Cha do chòrd seo idir ris an fhear òg. "Gu dearbh fhèin," thuirt esan, "tha seo cus nas miosa na bhith ag obair anns a' ghàrradh. 'S ann a dh'fheuchas mi rudeigin eile." A-mach a ghabh e a-rithist, agus an ceann greise ràinig e baile mòr. Dè chunnaic e an sin ach sanas ann an uinneig bùtha ag iarraidh gille a bhiodh ag obair anns an **taigh-fhuine**. Fhuair e an obair agus **cha b' fhada** gus an do dh'ionnsaich e mar a dhèanadh e an t-aran. Ach b' e siud an **obair chruaidh!** Bha na gàirdeanan aige cho sgìth 's ged a bhiodh e fon phoca chlach **o mhoch gu dubh**, agus a h-uile uair a dhèanadh e airson stad agus anail a leigeil, bha am bèicear ag èigheach **àird a chinn**. "Na stad idir, a bhalaich, na stad, air neo thèid an t-aran **a dholaidh**, agus bidh e **gun fheum**." Ann an ùine gun a bhith fada thuirt am fear òg ris fhèin nach b' e siud obair dhàsan idir agus a-mach a ghabh e a-rithist agus cha b' ann glè thoilichte.

An ceann greise thàinig e gu àite far an robh fear a bha a' cumail sheilleanan. "Chan fhaod e a bhith," thuirt an gille ris fhèin, "nach còrdadh e riumsa a bhith ag obair aig an duine seo; tha fios is cinnt gur e obair mhath a th' ann a bhith a' cumail sheilleanan agus a' reic mil." Bha fear nan seilleanan gu math deònach obair a thoirt dha. Thug e dha aodach a chuireadh e air aodann 's air a cheann agus miotagan airson dìon a chur air a làmhnan, agus sheall e dha mar a chruinnicheadh e a' mhil. Ach nach ann a thòisich na seilleanan ag èaladh a-steach fon aodach, agus tro na miotagan agus chuir iad **gath** ann **uair is uair**. **Thug esan a chasan leis** cho luath 's a ghabhadh, ag èigheach **àird a chinn**. "Till, till, thig air d' ais, thig air d' ais," bha fear nan seilleanan ag èigheach às a dhèidh, "'s fhada fhathast gus am bi sinn deiseil."



“Chan fhaic thu sin, mise a’ tilleadh an sin,” fhreagair an gàirnealair òg.  
“Chan eile mise ag iarraidh a bhith air mo mhurt aig na creutairean grànda sin. Tha iad ro mhath air **gath** a chur annad.”

“Nach eil fhios gu bheil,” fhreagair am fear eile. “Is tric a chuir iad **gath** annamsa! **Is iomadh uair** sin. Chan eil e idir furasta mil fhaighinn gun **gath** a dhol tromhad.”

“Seadh a-nis,” thuirt am fear òg ris fhèin, “’s e mo bheachd nach eil an obair agam fhìn cho dona a **dh’aindeoin cùise**.” Agus air ais gun do ghabh e, le cridhe aotrom agus spiorad **sunndach**, dhan ghàrradh aige fhèin agus chun na h-obrach a bh’ aige **bho thùs**.

